

Carta naçahyí Judas nuú na cúú cuéntá Jesús

Cáhyí Judas carta nuú na naçaxi Ndióxi cacuu na cuéntá mé á

¹Yehe cúú Judas, da cája chúun cuéntá Jesucristo ta cúú u ñani Jacobo. Cáhyí i carta yóho nu ndóhó jáchi cúú ndó na naçana Ndióxi, tátá yo. Cúú ndó na quíhvi ini mé á ta cúú ndó na ndáá Jesucristo jáchi in nanduu ndó xihín mé á. ²Ña xíca tahví i nu Ndióxi queá ña ná tahnda ndivaha ini mé á saha ndo. Ta ná caja mé á ña ná coo vaha ndivaha ini ndó. Ta ná chutú ndaa ini ndó xihín ña quíhvi ini a ndohó.

Cáhan Judas sahá na jánaħa ña tuhún

(2 Pedro 2:1-17)

³Candehé ndo, ñani mí i, na cúú cuéntá Jesús. A juú quiahva naxinu ini i cáhyí i nu ndo saha ndá quiahva najácacu Ndióxi ndihí. Joo viti ndíhi ini i cáhyí i carta yóho nu ndo ná caça tahví i nu ndo ña ná a jándacoo ndó ña cándéé ini ndó Jesucristo jáchi ña yóho cúú á ña in tañu cuití va nasahan Ndióxi nu yo, na cúú cuéntá mé á. ⁴Jáchi java ñayivi nandaja na mé ná tátuhun na cúú cuéntá Jesús ta naquihvi nuu na tañu ndó jan. Mé ñayivi yóho cúú ná na sa cáhan tuhun Ndióxi saha janda jihna ndivaha ta cáchi a ndítahan nu ná cūhun na indayá. Cúú ná ñayivi quini jáchi jánaħa na ña tá sa naçaja cáhnu ini Ndióxi sahá cuachi na já cuu caja na tá nuú cuachi ña cúni mé ná. Ta xihín ña yóho náħa ña co xéen na candúsa na Ndióxi, mé á cómi cuéntá saha tóco ndihi ñaha. Ta jári náħa ña co cúú ná cuéntá Jesucristo, xitoho í.

⁵Sa xini ndo ña nandoho na Israel tá natavá Ndióxi na ñundáhyi Egipto sanahá. Ta viti jándicuhun ini i ndohó ña vatí natavá Ndióxi tóco ndihi na Israel cán Egipto joo tá nandihí najándihí a sahá na coo naxeen candúsa ñahá. ⁶Ta quiahva já naçaja ri mé á xihín na nasacuu tátō mé á jáchi coo naxeen na caja na ña cúni Ndióxi ta najándacoo na nuú nasanduu na. Saha ña cán queá nachicaji Ndióxi na nu naá ndivaha nu núhu na anda ama cáa quivi. Ta ndáti na cán xinu quivi caja víi mé á saha ná. ⁷Ta tá quiahva naçaja Ndióxi xihín mé tátō cán quiahva já naçaja ri a xihín ñayivi nuu

SAN JUDAS

Sodoma xihín na ñuu Gomorra ta xihín na nanduu ñuu ñéhe táhan xihín ndíví ñuu yóho. Najándihi Ndióxi saha ná jáchi nandiquiahva na yiquí cuñu na ña ná caja na tá nuú cuachi. Ta ndaja táhan mé taa nacaja cuachi xihín táhan da. Sahá ña cán quéa najácuyi Ndióxi núhu cáyi jata ná. Ta quiahva já ndoho na anda ama cáa quivi. Ta xihín ña yóho jánaha Ndióxi nu yo ña quiahva já cuu ndoho ri mé ví tá co cája í ña cuni mé á.

⁸Tá quiahva nacaja ñayivi sanahá quiahva já cája ri na jándahvi ndohó viti. Jáchi cúu ná ñayivi quini, na cája cuachi ta tá xíní na cája na in cuachi já cuahan na cája ná ña. Mé na cán cája na ña núu xihín yiquí cuñu na ta quéhe núu na Ndióxi jáchi co quéhe na cuénta nu cáhan mé á xihín ná ta co yíhvi na cánahá na xihín táto Ndióxi indiví, mé á íin ndée cája cuahá ñaha. ⁹Ta janda mé á cúu sacuahá nu tóco ndihi táto Ndióxi naní a Miguel ni coó nacanahá a xihín tiñahá sacuahá. Ta ni co naxeen a cahan núu a xihín rí tá nacani táhan mé á xihín rí saha yiquí cuñu Moisés. Na nacachi a xihín rí quéa: “Ndióxi ná jánani a yohó”, nacachi a xihín ri.

¹⁰Joo ñayivi quini, na xíca jándahvi na cúu cuénta Jesús yóho, co yíhvi na cánahá na xihín ña co cándaa ini na saha. Joo cája na ña xíca ini yiquí cuñu jáchi cúu ná tátuhun quíti, rí co xíní túni ta ña núu cája na yóho jándihi a saha ná.

¹¹Ndáhvi ndivaha nacuu na jan jáchi cája na tá quiahva nacaja Caín, da nasahní ñani sanahá ndivaha. Ta jata jiuhún cuití va cája na ñaha tá quiahva nacaja Balaam sanahá. Ta cája ri na tá quiahva nacaja Coré sanahá tá nandínehe yúhu dá nu Ndióxi. Ta saha ña yóho ndihi saha ná.

¹²Jáchi na jándahvi ndohó jan jácacahan na nuu ndo tá táca ndo xíxi ndó xihín java na cúu cuénta Jesús. Jáchi yáha ndivaha ña xíxi na jan ta coó toní núhú na xihín ña cája na. Ta saha mé cuití va na ndíhi ini na. Cúu ná tátuhun víco núhú, ña xíca nuu cája tachi ña co ndójo javi. Ta cúu ná tátuhun yíto cuihi, do co cúun ñaha nuu tá ndítahan cuun cuihi nu do. Cúu ná tátuhun yíto, dó natuhun na janda yóho dó jáchi coó nacuun cuihi nu do. Ta cúu ná tátuhun na nandíhi saha chí in ndeé. ¹³Ña cája na jan cúu á tátuhun yáco cándoo nuu chíquiñu tañuhú tá ndícojo do jáchi ña cácahan nuu yo cúu ña cája na jan. Cúu ná tátuhun quimi, rí najana ta co ndínehe rí nuú nasahiin rí. Ta saha ña cája na cañuhu na nuú naá ndivaha anda ama cáa quivi caja Ndióxi.

¹⁴Ta janda sanahá da naní Enoc, da nasacuu da usa nuú chichi Adán najáyaha da tuhun nacahan Ndióxi saha ña núu cája na jándahvi ndohó cán. Ta já nacachi da já: “Candehé ndó. Sa vaxi Jesucristo, xitoho í xihín cuaha mil táto yii mé á ¹⁵ña ná caja víi a saha tóco ndihi na ndúu ñuyívi. Ta jándoho a ini tóco ndihi ñayivi saha ndihi ña núu nacaja na. Ta quiahva já jándoho a ini na saha tóco ndihi tuhun ihvi nacahan na saha mé á”,

SAN JUDAS

naçachi Enoc saha ná. ¹⁶Mé ñayivi quini yóho ni in ñaha co táhán ini na xihín ta cáhan núu na saha tóco ndihi ñaha. Ta ní tiempo cája na ña xíca yiquí cuñu na cuití va. Ta ndíñehe jícó ndivaha na mé ná tá cáhan na nuú ñayivi. Ta cáhan vaha na sahá ñayivi ña ná nuná nuu ná jándahvi ñahá na.

Jácahan Judas na cúu cuéntá Jesús ña ná candeé cáhnu ini na Ndióxi

¹⁷Candehé ndo, ñani mání, na cúu cuéntá Jesús. Xíní ñúhú ndicuhun ini ndó ña naçachi na apóstol cuéntá Jesucristo, xitoho í xihín ndo sanahá.

¹⁸Mé na cán naçachi na xihín ndó já: “Tá ná cayati quiví ndihi sahá ñuyiví yóho já quéa cacu nuu ñayivi cuacu ndaa na Ndióxi. Ta caja na tá nuú ña núu ña xíca ini mé ná caja na”, naçachi na cán. ¹⁹Mé ñayivi quini yóho cúu ná na xíca sáhdá java táhan na cúu cuéntá Jesús. Ta cája na ña núu ña cáhvi ini na caja na ta co ndácaan ínima yíi Ndióxi ini na.

²⁰Joo mé ndó, ñani mání, na cúu cuéntá Jesús xíní ñúhú coo ndacú ini ndo xihín ña candeé ini ndó Jesús jáchi ña jan cúu á ña yíi ndivaha. Ta xíní ñúhú caca táhvi ndo nu Ndióxi xihín ndée ña sáhan ínima yíi mé á nu ndo. ²¹A cáxoo ndó nu Ndióxi jáchi quíhvi ini a ndohó. Ta candati tiahva ndó xinu coo quiví caja Jesucristo, xitoho í ña ná catacú anda ama cáa quiví jáchi mé a ndaa táhvi ini a saha yo.

²²Ta ndítahan candáhvi ini ndó ndá na cáhvi ivi joho ini saha Jesús. ²³Já quéa jácacu Ndióxi na ña ná a cúhun toho na indayá. Xíní ñúhú candáhvi ini ndó na. Joo cuéntá coo ndó xihín ná já ná a cásahá ndo caja ndó cuachi tá quiahva cája mé ná jáchi na cán cuu jácaquini na ndohó.

Cája cáhnu Judas Ndióxi

²⁴Mé Ndióxi quéa íin tóco ndihi ndée chindeé a mí ña ná a ndácava í nuú cuachi já ná cuu coo víi yo tá ná xinu coo í nu íin mé á. Ta caja mé á ña ná chutú ndaa yo xihín ña cájii iní tá ná xinu coo í nu íin mé á ta a juú quiahva ndató cáa cán. ²⁵In túhún jiní mé á cúu Ndióxi, mé á jácacu mí sahá ña naçaja Jesucristo, xitoho í. Cóho caja cáhnu í Ndióxi jáchi yéhe ndivaha mé á ta cáhnu ndivaha cúu á ta íin cuahá ndée á ta mé á quéa cómí cuéntá saha tóco ndihi ñaha. Cáhnu cúu mé á viti ta anda saha ta anda ama cáa quiví cáhnu cúu mé á. Já ná coo.